

**PEMBERITAHUAN PERTANYAAN  
DEWAN RAKYAT, MALAYSIA**

**DARIPADA : Y.B. DATO' MOHD ARIFF SABRI BIN ABDUL AZIZ  
(RAUB)**

**PERTANYAAN : LISAN**

**TARIKH : 09.10.2014**

**Y.B. DATO' MOHD ARIFF SABRI BIN ABDUL AZIZ [ RAUB ] minta  
MENTERI KEWANGAN menyatakan :-**

- a) adakah Kerajaan memperakui terlebih dahulu atau 'endors' pengurangan pekerja MAS seramai 6,000 orang; dan
- b) adakah Kerajaan berpuas hati mengenai kaedah memutuskan bahawa MAS hanya memerlukan 14,000 kakitangan.

**JAWAPAN**

Tuan Yang di-Pertua,

Untuk makluman Ahli-Ahli Yang Berhormat, menurut piawaian dan penanda aras industri bagi syarikat-syarikat penerbangan yang mempunyai persamaan dengan MAS dari segi saiz, laluan dan pelan perniagaan, jumlah optimum tenaga kerja yang diperlukan oleh MAS adalah seramai kira-kira 14,000 orang bagi memastikan operasi yang cekap dan produktif. Justeru itu, adalah dianggarkan seramai kira-kira 6,000 pekerja akan terlibat dalam proses pemberhentian (*retrenchment*). Ketika ini, MAS giat melaksanakan proses tapisan untuk menentukan *outfit* terbaik dari semua peringkat pengurusan dan sokongan bagi memperoleh kos operasi yang optimum.

Bagi memberikan sokongan kepada kira-kira 6,000 kakitangan MAS yang terlibat dalam proses pemberhentian tersebut, Khazanah Nasional Berhad (Khazanah) akan menujuhkan sebuah pusat khas atau *Outplacement Centre* (OPC) di bawah Pelan Penyusunan Semula MAS. OPC ini akan menyediakan khidmat sokongan berkaitan yang diperlukan oleh pelbagai kumpulan pekerja yang akan meninggalkan MAS. Ini termasuklah

sokongan profesional, emosi dan kewangan untuk membantu mereka beralih pekerjaan ke peringkat seterusnya dalam kerjaya masing-masing.

OPC akan diletakkan di bawah naungan Pusat Latihan Semula Korporat (CRC) yang ditubuhkan bagi penyusunan semula dan sokongan perkhidmatan. CRC akan meliputi bidang seperti perancangan kewangan dan persaraan, panduan kerjaya dan kaunseling, penjalinan hubungan dengan majikan serta badan-badan berkanun yang berpotensi.

Tuan Yang di-Pertua,

Perjumpaan dengan kakitangan MAS menerusi beberapa sesi turun padang yang telah diadakan menunjukkan bahawa terdapat sokongan meluas ke atas penubuhan CRC dan OPC daripada kakitangan MAS di samping keinginan untuk mendapatkan maklumat lebih lanjut mengenai penyusunan semula ini. Kesatuan pekerja MAS berminat untuk mengetahui dengan lebih lanjut mengenai CRC dan OPC, khususnya jenis Latihan Semula yang disediakan, proses pemilihan, tempoh latihan, dan jangka masa untuk menyiapkan pusat tersebut.

Penempatan semula 6,000 orang pekerja dan jumlah pampasan bagi skim pemberhentian ini sedang dimuktamadkan sementara menunggu penyelesaian program penilaian bakat yang sedang dilaksanakan di MAS. Selain daripada skim pemberhentian, Khazanah juga sedang menilai skim untuk memastikan bahawa bakat terbaik diberi insentif dan dikekalkan dalam "MAS Baru".

Memandangkan jumlah dana yang besar serta usaha dan masa yang banyak diperlukan untuk menjayakan Pelan Pemulihan MAS ini, adalah kritikal bagi Kerajaan untuk memastikan pembentukan sebuah syarikat penerbangan yang berjaya dan mampan yang dapat menyumbang kepada ekonomi negara menjelang penghujung pelaksanaan rancangan ini. Oleh itu, Khazanah komited untuk memastikan proses pemindahan, penghijrahan dan pemberhentian yang melibatkan kakitangan MAS dilaksanakan dengan penuh cermat, adil dan menurut proses yang ditetapkan bagi meminimumkan kesan kepada mereka yang terlibat.

**SOALAN ( 21 )**

**PEMBERITAHUAN PERTANYAAN  
DEWAN RAKYAT, MALAYSIA**

**PERTANYAAN : LISAN**

**TARIKH : 9 OKTOBER 2014  
[ KHAMIS ]**

**DARIPADA : Y.B. DATUK JUMAT BIN IDRIS  
[ SEPANGGAR ]**

**SOALAN :-**

**Y.B. DATUK JUMAT BIN IDRIS [ SEPANGGAR ] minta MENTERI KESEJAHTERAAN BANDAR, PERUMAHAN DAN KERAJAAN menyatakan apakah jenis bantuan kecemasan yang disediakan oleh Kerajaan bagi mangsa-mangsa bencana kebakaran dan apakah garis panduan bantuan kecemasan ini.**

## **JAWAPAN :-**

Tuan Yang di-Pertua,

Untuk makluman Ahli Yang Berhormat, bantuan yang diberikan oleh Kementerian Kesejahteraan Bandar, Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) kepada mangsa-mangsa bencana kebakaran adalah dari aspek pembinaan semula rumah-rumah yang terbakar. Projek ini dilaksanakan melalui Program Pembinaan Rumah Di Bawah Program Strategi Lautan Biru Kebangsaan Ke 7 (NBOS7) : Kejiraninan Indah.

Terdapat beberapa syarat yang perlu dipatuhi oleh mangsa kebakaran bagi melayakkan mereka menerima bantuan tersebut, antaranya ialah:-

- (i) Kurang berkemampuan (miskin);
- (ii) Mempunyai tapak tanah sendiri; dan
- (iii) Mendapat persetujuan daripada peserta yang terlibat.

Sementara itu, Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) turut menyediakan bantuan kepada mangsa kebakaran. Bantuan yang yang disediakan ini terbahagi kepada dua iaitu:-

(1) Bantuan pemulihan jangka pendek di pusat pemindahan meliputi:-

- (a) Barang keperluan asas seperti tikar, selimut, bantal, pakaian, tuala wanita, pakaian, lampin, pakai buang dan lain-lain;
- (b) Makan/Minum seperti roti, biskut dan air mineral dan makanan bermasak; dan
- (c) Hygiene Kits seperti ubat gigi, berus gigi, gel mandian, tuala, syampu dan sikat rambut.

Bantuan pemulihan tersebut hanya meliputi mangsa kebakaran yang berpindah di pusat pemindahan sahaja.

(2) Bantuan pemulihan Jangka Panjang yang diberikan kepada mangsa kebakaran, sama ada bantuan kewangan melalui bantuan wang ehsan melalui Majlis Keselamatan Negara (MKN) atau bantuan pemulihan JKM, yang tertakluk kepada keputusan Jawatankuasa Pengurusan Bencana Negeri (JPBN) dan Jawatankuasa Pengurusan Bencana Pusat (JPBP).

Jabatan Kebajikan Masyarakat (JKM) menyediakan bantuan kepada kumpulan sasar seperti mana ditetapkan di bawah Arahan No.20, Majlis Keselamatan Negara iaitu :-

1. Menyedia dan menyelenggarakan pusat-pusat pemindahan mangsa-mangsa bencana.
2. Menyediakan dan mengedarkan bantuan makanan, pakaian dan lain-lain keperluan asas kepada mangsa-mangsa bencana.
3. Menjalankan pendaftaran mangsa-mangsa bencana bagi maksud pemulihan.

- Memberikan bimbingan, nasihat/kaunseling kepada mangsa-mangsa bencana.

#### **Bantuan Segera Persekutuan Kawasan Parlimen (BSKP)**

Dalam usaha mempercepatkan penyampian bantuan kewangan kepada mangsa bencana, termasuk mangsa banjir, Kerajaan Persekutuan telah menyalurkan Bantuan Segera Persekutuan Kawasan Parlimen (BSKP) kepada ahli Parlimen sebanyak RM50,000. Sehubungan itu, ahli Parlimen boleh menyalurkan serta-merta bantuan membaiki rumah akibat bencana alam dengan kadar maksimum RM500 untuk sesebuah keluarga.

Bagi bantuan pemulihan jangka panjang, Kerajaan Persekutuan juga menyediakan bantuan **Pemulihan Jangka Panjang** dengan kadar maksimum RM5000 mengikut ketua rumah setelah siasatan terperinci dijalankan bagi mangsa bencana termasuk kebakaran.

Dalam usaha melaksanakan dan menyediakan bantuan kepada mangsa bencana termasuk kebakaran, Kerajaan Persekutuan telah menyediakan garis panduan berikut:-

1. Peraturan Tetap Operasi Pengurusan Bencana Jabatan Kebajikan Masyarakat; dan
2. Majlis Kebajikan dan Pembangunan Masyarakat Kawasan Parlimen (MAYANG)